

Kalaallit Nunaanni sumiiffinni amerlasuuni unammilleqatigiinneq amingarsinnaasartooq ataqqillugu piffissap ilaani biilnik misissuisarnissamut siunnersuusiortussanik suleqatigiisitamik suligasuartussanik ataatsimoorluni pilersitsinissaq kissaatigalugu danskit Transportministereqarfiannut saaffiginneqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsartunut ilaasortaq Steen Lynge, Demokraatit)

Akissuteqaat

(Ineqarnermut Attaveqatigiinnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Steen Lynge Demokraatineersoq siunnersuummut qutsavigaara. Biilit aquttumut, ilaasunut allanullu angallattunut navianartorsiortitsinatik atorsinnaanissaat pingaaruteqartoq Naalakkersuisuni isumaqatigiissutigaarput.

Piffissakkaartumik biilnik misissuineq Kalaallit Nunaanni aqqusinikkut angallannermut inatsisip, akisussaaffigilerlugu tiguneqarsimanngitsup, ataaniippoq. Tamatuma kingunerisaanik inatsisit maleruagassallu danskit oqartussaasuinit suliarineqartarput.

Danskit-kalaallit suleqatigiissitaliaannik, aqqusinikkut angallannermi ajornartorsiutinut allanut ilaatillugu biilnik misissuisarnermik suliarinnittussanik, pilersitsisoqareerpoq. Ullumi oqallinneq suleqatigiissitaliaami tassani sulinerup pitsaassuseqarnissaanut iluaqutaassaaq.

Danskit ilusiliineranni piffissakkaartumik biilnik misissuisarneq tamaginnut pisussaaffigitinneqarpoq. Biilileriffinni namminersortuni akuersissummik allagartaqartuni tamanna ingerlanneqartarpoq, aammalu biilnik misissuinermut aningaasartuutit biilnik piginnittunit akilerneqartarluni.

Ilusiliinermik, suliaqarnermi atuutsinneqalersinnaasumik aammalu biilnik piginnittunut aningaasaqarnikkut akuerineqarsinnaasumik, nassaarniarnissaq Naalakkersuisut pingaartippaat. Inoqarfinni assigiinngitsuni biilit qassiunersut, kilometerinik qassinik takissusilimmik aqqusineqarnersoq, taamaalillunilu biilertut qanoq sukkatigisumik ingerlaarsinnaanersut, assigiinngitsorujussuuvoq. Tamanna angallannerup isumannaatsuunissaanut pingaaruteqartorujussuuvoq.

Suliaqarnerup ilaa tassaassaaq, Kalaallit Nunaanni inoqarfinnut tamaginnut piffissakkaartumik biilnik misissuisarneq atuutissanersooq, isummerfiginissaa. Tassunga atatillugu biilileriffiit akuersissummik allagartaqartut amerlassusaat pillugu apeqqut aamma nalilersorneqartussaavoq.

Suleqatigiissitaliaamik pilersitsisoqareernikummat aalajangiiffigisassatut siunnersuuteqartup kissaataatut aamma suleqatigiissitaliaq Kalaallit Nunaanni biilnik misissuinissamik siunnersuuteqartussaammat Naalakkersuisut siunnersuutip akuerineqarnissaa innersuussutigaaq.